



SPRACHWELTEN

Impedì u handicapà?

Jau salid el sin sia autezza. Quai vul dir jau fatsch schanugl per discutir cun l'impedì. El mussa in'avertadad ch'jau n'avess betg spetgà. El admonescha, meglier ditg el dat in lavachau cura ch'jau dovrel il pled impedì.

Suenter in discurs fitg interessant ses jau en la sutga cun rodas. L'emprima giada ma chat jau en ina situaziun dischagreabla. Il spazi d'agir è limità. La sutga cun rodas ma restrenscha. Jau vuess ma dauzar, ma la regla sa cloma: „Betg bandunar il vehichel durant la proxim'ura“. Ses plets vegnan endament. Effectiv, jau ma sent handicapada. Cun gronda fadia ma mov jau tras las curunas dal negozi. Tenor sia glista da cumissiuns manischesch jau la sutga cun rodas vers ils products da latg. Malgrà ch'i n'è betg mia moda - jau smaladesch. Ils jogurts da tschigulatta sa chattan sisum la curuna. Jau hai la schanuglia che trembla, perquai ch'jau stoss dumandar in client u vendider per agid. Cun gronds egls ed en hectica passan ils clients sperasvia. Pir en la sutga cun rodas percorsch jau quant svelts ch'il mund sa mova. Jau ma sent sco sardinas en mes pachet cun rodas. Il quart visitader dal negozi ma porscha finalmain agid. Impedida na sun jau betg, perquai ch'jau poss per fortuna far ir las rodas. L'ura na passa e passa betg. La partiziun da virtualias è ina suletta pista d'impediments. Suenter il termin cunvegni, pia suenter quest'ura, n'hai jau gnanc la mesadad da las vivondas previsas. Jau ma dumond co che handicapads vegnan a frida cun autras situaziuns, questa è la fin finala quotidiana. Dapi oz respect jau anc dapli persunas ch'enconuschan era la vart negativa da la vita.

Sibylle Pfiffner